

Ho Maria nia matadalan ita deskobre fali grasa no beleza sai FMA

Mensajen ba FMA sira – 3 Outubru 2013

Iha loron ida-ne'e, hanesan iha ita-nia moris tomak, ita husik "Maria kaer ita-nia liman" atu nia tulun ita deskobre beleza no grasa ita-nia vokasaun nian iha Kreda no iha sosiedade ohin.

Ba Don Bosco, hanesan mai ita, mehi tinan sia nian mak entrega foin boot ida: Jezús haraik mai ita nia Inan nu'udar tulun no mestra estilu edukativu ida-nian, arte ida atu moris ohin bolun boot atu sai dixípula Jezús nian no misionária Evanjellu nian.

Fundamentu bíbliku atu ita iha serteza katak "Maria mak gia ita", ita hetan iha Evanjellu João nian. Oinsá mak ita bele iha serteza katak Maria mak ita-nia inan, akompaña ita, tulun ita atu halo esperiênsia kona-ba Jezús? Ita iha serteza tanba ita sadere ba Jezús rasik nia liafuan, iha ninia entrega boot halo iha krús: nia haraik buat hotu mai ita, hela de'it mak nia Inan no, atu iha Kreda, Ninia prezensa moris nafatin Nia haraik nia Inan "memória moris Jezús nian", edukadora nia Kreda nian iha ain-hakat evangelizasaun foun nian.

1. Maria Jezús nia prezente ba nia Kreda

Ita-nia reflesaun simu naroman husi pasajen Evanjellu João nian (kf Jo 19, 26-27). Iha Jezús nia liafuan sira ba Maria no ba eskolante João husi krús Maria nia prezensa no knaar formativu iha Kreda no ba Kreda hetan énfaze: "Na'i-Feto, ida-ne'e ó-nia oan!" no ba João: "Ida-ne'e ó-nia inan!" (Gv 19, 27).

Liafuan sira-ne'e, Ratzinger hakerek, "mak tebes duni pontu sentrá ba medítasaun mariolójika hotu". Maternidade foun Maria nian mak "mak fuan husi domin foun ne'ebé sai tasak iha krús ain".

Sena evanjélika konklui nune: "No hori oras-ne'ebá eskolante simu nia iha nia uma" (Jo 19,27). Nia simu nia "nu'udar ninia soin rasik", katak introdús nia iha ninia moris íntimu liu, nu'udar entrega an ki'ik ida ba malu, ne'ebé sai ho modu kontínuu dalan ida atu Kristu moris nune'e ema hotu bele sai buras iha maturidade Kristu nian.

«Espresaun "acceptit eam in sua" [lori ho nia] nakonu ho signifíkadu: nia hatudu João nia desizaun atu halo Maria partisipa iha nia moris rasik, to'o halo nia koko katak ema ne'ebé loke nia fuan ba Maria, iha realidade Nia mak simu ema ne'e no halo sai ninian. Lema ne'ebé marka pontifikadu Papa João Paulo II, Totus tuus, sintetiza didi'ak esperiênsia espirituál no mística ida-ne'e, iha moris ida orienta tomak ba Kristu liuhusi Maria: "ad Iesum per Mariam"».

Ita FMA mós simu Maria iha ita-nia moris, iha ita-nia comunidade edukativa sira no experimenta ninia prezensa moris nian. Projetu formativu ko'alia kona-ba "don ida grasa nian" Maria nia prezensa iha Kreda, iha Institutu relijiozu marianu oiain no ho modu espesiál iha ita-nia moris. Nia simu ita nu'udar oan-feto sira no halo ita sai tasak nu'udar sarani no nu'udar konsagrada.

«Iha Kalváriu Maria simu eskolante ne'ebé Jezús identifika nia an. Nu'udar inan nia simu bolun atu eduka, atu halo sai nabilan iha nia oan mane no feto ida-idak identidade kle'an liu ne'ebé Aman komunika mai ita, iha Kristu, liuhusi Espíritu Santu. Nia ho ninia maternidade edukativa kontribui atu forma iha ema ida-idak ilas Kristu nian (kf Gal 4,19) ne'ebé marka iha ema hotu husi kedas kriasaun.

Nu'udar inan no mestra, Virjen Maria inspira ita estilu ida moris relijioza nian kontemporánea ho ita-nia tempu no tulun ita atu hetan lurón sira adekua liu atu sai sinál no espresaun Maromak nia domin preveniente ba foin-sa'e sira (kf Konst 1)».

2. *Naran FMA: sínteze identidade ida nian*

Fundadór ida-idak kondensa iha naran ne'ebé atribui ba ninia Konregasaun sínteze ninia vizaun karizmatika, ninia mehi, ninia projetu, ninia inspirasaun.

Figlie di Maria Ausiliatrice mak naran ne'ebé Don Bosco fô ba Institutu husi ezbosu dahuluk Konstituisaun nian no hafoin ho modu ofisiál iha loron fundasaun nian: «imi pertense ba Família relijioza ida ne'ebé Na'i-Feto nian tomak. [...] Imi iha nu'udar glória título furak 'Figlie di Maria Ausiliatrice' no hanoin nafatin katak imi-nia Institutu tenke sai monumentu moris gratidaun Don Bosco nian ba Maromak nia Inan, invoka ho título Sarani sira nia tulun».

Konsittutisaun sura kodifika ita-nia Fundadór sira-nia serteza: Institutu mak “Maria nian tomak”:

- * tanba Maria mak inspira nia ba Don Bosco. Nia hakarak Institutu ne'e ho “intervensaun direta” (kf art. 1), no haraik bensen ba nia iha istória tomak no kontinua haraik bensen nia;
- * mosu husi grupu 'Figlie di Maria Immacolata'. Iha nia laran iha espiritualidade ida moris hamutuk ho Maria, ne'ebé sai riku ho kontribuisaun husi espiritualidade saleziana;
- * Institutu “moris” husi Don Bosco nia domin filiál ba Maria Ausiliadora no husi ninia hakaran atu oferese ba nia omenajen ida gratidaun rohan-laek nian ne'ebé moris nian, la'ós husi fatuk hanesan Bazílika;
- * Maria presente ho modu ativu iha Institutu nia istória no iha FMA sira nia moris (kf art. 44);
- * FMA sira simu bolun atu hanaruk iha tempu Maria nia misaun tulun preveniente no maternu liuliu ba juventude (kf art. 4).

Se Institutu iha identidade mariana intrínseka, FMA ida-idak iha identidade mariana ida ne'ebé tenke kontinua deskobre no moris tuir iha konfrontu ho dezafiu sira ohin nian. Iha FMA ida-idak nia DNA iha Maria. Naran mak esprime identidade ne'ebé karakteriza Institutu iha Kreda. Iha FMA nia naran iha aspetu partikular rua: relasaun filiál membru sira-nian ho Maria no sira-nia misaun iha sosiedade no iha Kreda.

Relasaun filiál ne'ebé FMA ida-idak iha ho Maria sai dalan “performativu” ida loos nian, iha sentidu katak, liuhusi relasaun kle'an ida-ne'e ho Maria, FMA sai “tulun-na'in” ho Tulun-Na'in iha foin-sa'e kiak sira nia leet. Naran mak fó ba ita-nia ezisténsia vizaun projetuál ida no dinámika: ne'e mak movimentu ida nakloke ba profundidade tanba hatudu sé mak ita no sé mak ita bele sai.

3. *Signifikadu sai oan-feto no sai “Agradesimentu”*

Ita-nia tempu lakon ona aspetu sai oan / filiasaun, lakohi iha dependénsia ida, hakarak autonomia absoluta.

Ohin loron inan-aman no edukadór barak, tanba lakon orientasaun no korajen, hetan tentasaun atu husik sira-nia knaar nu'udar aman/inan; nune'e hetok aumenta tan labarik no foin-sa'e sira ne'ebé sente hanesan oan-kiak.

La iha ema ida ne'ebé bele hasees an husi esperiénsia oan nian, defaktu, ne'e mak «esperiénsia konstitutiva ema nian, nu'udar relasaun únika ne'ebé ema ida labele sees. Ita bele pasa moris tomak

hodi nunka sai aman eh inan, maun-alin eh biin-alin, la'en eh feen, maibé la'ós posivel evita esperiênsia filiasaun nian». Nune'e, «kondisaun oan nian la pertense ba momentu ida moris nian, maibé ba moris tomak».

Filiasaun fó hanoin kona-ba ita-nia hun, ita-nia orijen, husi ne'ebé mak ita mai: husi Aman ne'ebé moris hun no hadomi ita nu'udar oan doben sira, husi Oan ne'ebé halo ita sai Aman nia oan no maun-alin no biin-alin entre ita; husi Espíritu Santu ne'ebé hakilar iha ita “Abbà” no eduka ita atu sai oan sira; husi Maria ne'ebé Jezús haraik mai ita nu'udar Inan.

Esperiênsia filiál mak esperiênsia liberdade nian, ne'ebé halo ita supera moris-atan hotu, tanba domin horik iha ita no iha-ne'ebé iha domin iha liberdade.

Esperiênsia filiál mak esperiênsia gratuidade nian: ha'u eziste tanba ema hadomi ha'u no hakarak ha'u iha molok ha'u rasik hili. Vida mak gratuidade loos de'it: simu nu'udar presente.

Esperiênsia filiál hamosu gratidaun. Falta iha filiasaun hamosu falta iha gratidaun.

Don Bosco hakarak ita sai FMA, katak iha relasaun intimidade nian ho Maria, husi ne'e nu'udar konsekuensi natural suli ita-nia identidade: sai AGRADESIMENTU ba Maria.

Ema ne'ebé moris esperiênsia filiál, rekoñese katak buat hotu nia soi mak presente loos de'it.

Husi ne'e mai ezistênsia “agradesida”, no tanba ne'e mak ita-nia espiritualidade mak espiritualidade Magnificat nian.

Maria tenke sai mós mai ita mestra gratidaun nian. Ninia harohan reflète ida Jezús nian: “Ha'u hahi'i Ita. Aman!”

Maria hananu: “Ha'u-nia klamar hahi'i Na'i!”. Nia haree Maromak nia paternidade, orijen no beematan ba nia moris. Nia sente ho profundidade katak Aman hanoin nia, hadomi nia, hili nia iha fetoraan seluk nia leet atu sai tenda no horik-fatin Na'i Leten-Aas nian.

Ema define Magnificat nu'udar lalenok Maria nia klamar nian: defaktu nia hatudu ninia espíritu nakonu ho admirasaun ba Maromak ne'ebé hala'o nia obra iha istória nakonu ho laran-sadia ba ema kiak sira.

Nu'udar FMA ita hateke ba Maria ne'ebé rekoñese kmanek sira Espíritu Santu halo iha nia. Ita mós simu bolun atu sai konxiente kona-ba buat ne'ebé Maromak halo iha istória la'ós de'it Don Bosco nian, maibé Kreda nian, humanidade nian, ita-nia Inspetoria sira no comunidade edukativa nian.

“Monumentu moris gratidaun nian” iha finalidade atu hahi'i Maromak ba ninia laran-nurak/ternura no laran-sadia. Maria eduka ita ba atitude kontemplasaun nian ba “obra boboot Maromak nian” ne'ebé prezerva ita husi superfisialidade, husi fragmentasaun, husi banalidade.

Ita-nia irmán ida, mate iha Roma loron 1 Agostu 2005, irmán Maria Ida Paggi, esprime ninia atitude gratidaun nian ho Maria ba Aman:

«Nu'udar FMA ha'u mak ‘agradesimentu’ Don Bosco nian ba Tulun-Na'in.

Nu'udar kriatura ha'u hakarak sai ‘agradesimentu’ universu nian ba Maromak nia Kbiit-wain kriadora.

Nu'udar ema ha'u hakarak sai ‘agradesomentu’ ba mane no feto hotu ba don rohan-laek sira ne'ebé Na'i kontinua hasuli ba sira.

Nu'udar ema sarani ha'u hakarak sai ‘agradesimentu’ fiar-na'in sira-nian ba fiar, ba grasa Eukaristia nian, ba Maria, ba don boot liu, Espíritu Santu.

Nu'udar konsagrada ha'u hakarak sai ‘agradesimentu’ Kreda nian ba Kristu nia domin rohan-laek ne'ebé inspira no gia obra difuzaun Evanjellu nian, ba santifikasaun klamar sira-nian.

Ha'u-nia naran foun iha moris rohan-laek mak Obrigada eh Aleluia mós ne'ebé esprime ksolok agradesimentu iha adorasau».

Maibé la to'o hananu Magnificat, presiza reprodús iha ita no iha comunidade sira kontestu Magnificat nian. Iha vida komunitária, hanesan iha Mornese “uma Maromak nia domin nian”, iha-ne'ebé “hahi'i Maromak ba nafatin”, ita kontinua Maria nia Magnificat ho kondisaun katak loroloron ita moris “iha karidade no iha ksolok” (art. 62).

Iha-ne'ebé iha komuñau ksolok nian bele suli ho lialoos knananuk Maria nian, selae ita-nia orasaun iha risku atu lakon signifikadu no sai repetisaun fórmula nian de'it.

Prezensa ne'ebé haklaken Na'i soi nia abut iha fiar ida metin no forte, ne'ebé tau iha sentru – hanesan Maria hanorin iha Magnificat – la'ós buat ne'ebé ita halo, maibé buat ne'ebé Maromak halo mai ita. Iha sentru Kristianizmu nian la tau ita-nia hahalok di'ak eh aat, maibé Maromak nia hahalok, Nia domin mai ita. Nia hatudu An iha ita-nia pobreza.

Evanjelizasaun ma haklaken Nia, Ninia domin, Ninia obra nakonu ho maravilla.

Padre Filippo Rinaldi iha 1918 iha konferénsia ida ba FMA sira Torino nian afirma ho modu insizivu nune'e: «Oan-feto sira, imi hanoin didi'ak ida-ne'e: la'ós Dama sira, la'ós Inan sira, eh Mestra sira, eh Irmán sira, la'ós Atan sira, maibé Oan-Feto sira! [...] Sai oan-feto signifika sai nafatin joven, pelumenus iha espíritu, haraik-an nafatin, delikada no simples iha buat hotu no ba ema hotu. Nune'e mak imi tenke sai: oan-feto ho labarik sira ne'ebé entrega ba imi-nia kuidadu, katak midar, prontu atu serví, lahó apoiu no lahó pretensaun, ba naran título ida imi iha. Karákteer oan-feto sira-nian ida-ne'e imi hatudu ba imi-nia irmán maluk sira, hodi esprime ba sira laran-di'ak, karidade, hahalok mamar, tulun efikás. Imi hatudu liuliu ba imi-nia superiora sira, hodi buka atu sai ki'ik-oan, nakloke no hakruuk ba sira. [...]

Jezús mak Maria nia oan, no imi sai hanesan nia. Nia entrega imi ba Inan lalehan ne'e, ne'ebé hamatan imi ho domin rohan-laek: sin, imi buka nafatin nia ho konfiansa filiál no imi sei hetan nia tulun ho kbiit maka'as».

Iha tinan hanesan 1918, padre Rinaldi filafali ba karakterístika mariana vokasaun FMA sira-nian hodi esplisita aspetu ida ne'ebé ladún hetan iha fonte sira: «Imi tenke rai nia nu'udar Inan, liurai-feto, maibé liuliu nu'udar imi-nia belun, imi tenke buka beibeik nia nu'udar inan belun ida ne'ebé hadomi imi. Nia imi-nia belun ho modu partikulár no imi ladún hadomi nia karik, tanba se imi sente intimidade ida-ne'e iha imi sei aumenta espíritu Don Bosco nian. [...] Sei hadomi di'ak liu Na'i hodi hadomi Nia liuhusi Na'i-Feto ».

4. FMA nia moris: memória Maria nian ne'ebé moris

FMA barak moris esperiénsia kle'an ho Maria: sira sente nia maluk viajen nian, inan laran-nurak nian no aten-barani misonária. Sira tebes duni “lori ba sira nia uma” hodi koko efikásia iha formasaun. Maski nune'e, iha ita-nia fonte sira, ita la hetan elaborasaun sistemátika esperiénsia mariana nian ne'ebé moris liu iha Institutu husi nia orijen to'o ohin loron. Ita hetan de'it liafuan badak, deskrisaun lais ne'ebé halo ita intui intensidade no kbiit espirituál vida ida “Maria nian tomak”.

Irmán Lina Dalcerri ko'alia kona-ba “konfigurasaun” ba Maria nu'udar “ragoin d'etre” FMA nian iha Kreda: Maria mak forma ba sira nia an no sira-nia hahalok.

Hakbesik ba irmán barak nia perfíl biográfiku bele haree hanesan aliansa ida entre Maria Tulun-Na'in ho nia oan-feto sira. Maria tulun ninia Família ida-ne'e no promove no dezenvolve obra sira; husi sira-nia parte, oan-feto sira habelar ninia koñesimentu, domin, devosaun, serteza kona-ba prezensa domin nian.

Irmán Maria Domenica Mazzarello nia moris hala'o iha "Maria nia matan nia okos no hodi ninia matadalan". Ninian mak istória ida saran an tomak nian ba Maromak liuhusi Maria nia liman sira (Sirkulár n. 875).

* Sai fiél ba "tradisaun atu konserva uma no obra sira hodi Maria Ausiliadora nia naran" mak sinál ida kona-ba sira-nia konxiénsia atu hatutan Maria nia prezensa iha misaun edukativa.

* FMA barak mak to'o atu realiza sira-nia vokasaun relijioza iha dalan ida esperiéncia mariana kle'an ne'ebé hala'o durante sira-nia hola-parte ba asosiasaun mariana sira. Maria mak gia sira atu dixerne Maromak nia vontade, atu disponivel ba Nia, barani atu hasoru difikuldade sira. Iha kazu ruma nia intervein ho kbiit atu loke dalan, atu sustenta fidelidade no perseveransa iha provasaun sira.

* Fonte sira fó sasin katak enjerál FMA sira kuda domin filiál ba Maromak nia Inan ne'ebé esprime iha orasaun, iha selebrasaun sira, iha moris, iha laran-manas apostóliku. Sira moris iha Inan nia prezensa, ho nia hakmaluk, hodi modela an tuir nia ne'ebé matan moris ba Espíritu no pronta atu tulun, atu bele reprezenta nia ho moris iha mundu.

* Liuliu iha misaun edukativa FMA sira buka atu modela an tuir Maria nia atitude, atu sintoniza ho ninia dispozisaun haraik-an nian no lais atu buka menina sira nia di'ak.

Madre Angela Vespa, nu'udar banati, iha konviksaun katak misaun edukativa halo edukadora saleziana sira sai ida de'it ho funsaun materna no ausiliadora Maria nian, protagonista ativa iha comunidade edukativa sira. Nune'e mak nia hakerek: "Na'i-Feto hakarak ita sai ninia tulun-na'in sira atu forma feto-raan sira ba vida sarani ne'ebé Nia simu iha ita-nia uma sira. Presiza ariska ho modu santu! Dirije ba leten atu tulun sira haburas sira-nia dignidade pesoál rasik nia lala'ok". Nune'e mós mak ita-nia Madre esprime iha sirkulár ida: "Nu'udar FMA ita simu bolun atu sai ba sira tulun-na'in hamutuk ho Tulun-Na'in (kf Konst 4). Inspiradora Sistema Preventivu nian, Nia eduka ita ba amabilidade edukativa, sinál no espresaun Maromak nia domin nian" (n. 875).

* Esperiéncia filiál halo ita sente maun no biin-alin: nia mak tau fundamentu ba fraternidade nune'e kria família. Maria sai mai ita paradigma maternidade nian ne'ebé hahoris, simu, harohan daet, akompaña, tahan, defende no promove moris. Ita mós, hanesan nia, simu bolun atu okupa ita-nia fatin iha istória, iha ita-nia comunidade, iha Kreda, hodi dedika an ho responsabilidade ba jerasaun foun nia formasaun.

* FMA barak soi priviléjiu kona-ba esperiéncia mariana partikulár ne'ebé karakteriza sira-nia santidade no sira-nia dedikasaun edukativa. Sira husik Maria gia no tulun sira no, sira mós sai kolaboradora iha dosilidade Maria nian.

Irmán Paganotto Filea Regina (1908-1959) hateten katak "ita mak templu moris nian dedika ba Maria".

Irmán Maria Romero (1902-1977), ne'ebé asimila ho kle'an Evanjellu ema kiak sira-nian, moris iha Maria nia matadalan beran-boot, ninia Liurai-Feto. Buat hotu ne'ebé husu nia hetan, dalabarak hakat liu lójika rasonál sira. Nia halo propóztu atu Maria bá uluk ba nia ho orasaun badak ida ne'ebé nia inventa: *Pon tu mano, Madre mia, ponla antes que la mia*. Laiha buat ida nia hahú lahó serteza konfiante ida-ne'e. Hanesan Don Bosco nia mós hateten: "Na'i-Feto mak halo buat hotu no sei halo tan buat ne'ebé sei kuran..."

Nia formula ninia programa vida espirituál nune'e: "Buat hotu liuhusi Maria Jezús nia inan no ha'u-nia inan". Iha nivel prátiiku nia propoin atu saran an ba Maromak no ba kiak sira ho Maria, iha Maria no ba Maria.

Ita bele konsidera nia moris "knananuk ida ba Virjen" la'ós de'it tanba nia kari Magnificat no Ave Maria tuir dalan, iha-ne'ebé de'it mak nia bá, maibé mós tanba nia lori ba Maromak, liuhusi Maria, foin-sa'e no família lubun-boot ida.

Irmán Ersilia Crugnola (1892-1973) mak ezemplu ida konfiansa totál nian iha intervensaun materna Maria nian. Estátua Maria Ausiliadora nian, ne'ebé nia rai ho kuidadu boot, mak sinál ida ne'ebé fósasin kona-ba FMA ne'e nia fiar boot ne'ebé hetan husi Maromak nia Inan grasa sura-laek no mós milagre sira. Hanesan Don Bosco, nia mós afirma ho konvikasaun segura: "Maria mak halo buat hotu. Ami rua komprende malu didi'ak: ami iha nafatin konfiansa ba malu". Ba moris tomak nia hanorin irmán sira buat ne'ebé nia rasik moris, katak tama iha Maria nia eskola, atu keta laran rua-rua kona-ba ninia tulun, atu halo ema koñese no hadomi nia, atu moris hanesan Maria no ho ninia hakmaluk. No Maria halo nia koko ho modu sensível ninia prezensa inan no matadalan nian.

Iha entrevista ida ba madre Antonietta Böhm, ne'ebé ba nia madre Ersilia Crugnola husik hela státua-oan Na'i-Feto nian hodi dehan ba nia "Halo nia serbisu!", ba pergunta: "Sé mak Maria Ausiliadora ba ita-boot?" nia hatán: «Ba ha'u nia mak ha'u-nia Inan, ha'u-nia matadalan! Ha'u konsulta nia no ha'u haree katak nia hatán mai ha'u. Ami hanesan belun na'in rua ne'ebé moris iha komuñau kle'an».

No ba pergunta: "mensajen sá loos mak ohin-loron ita husik ba FMA sira?": «Ha'u fós konsellu ba hotu atu iha fiar no konfiansa wain iha Maria Ausiliadora hanesan Don Bosco no Madre Mazzarello iha. Iha haka'as an iha virtude haraik-an no simplisidade nian. Imi kuda orasaun no soi fuan ida ne'ebé di'ak no nakloke ba labarik no foin-sa'e sira, jerasaun difisil tanba família uitoan de'it mak hatene eduka ba vida sarani».

Tuir dalan ita-nia moris nian, Maria kontinua tulun ita atu la moris iha periferia an rasik nian, maibé hatudu mai ita sé mak ita: feto sira ne'ebé simu bolun ba kontemplasaun, ne'ebé mistériu horik-ba no tanba ne'e nakloke ba komuñau no haklaken-na'in Jezús nian iha ksolok no konviksaun.

Ninia "pasar" iha ita-nia uma sira fós seguransa, konfiansa, ksolok kle'an ba ita-nia moris. Hanesan ne'e mak Don Bosvo "haree" no hanesan ne'e mak Kreda tomak sente iha tempu hotu.

Mate la hakotu Maria nia ligasaun ho nia oan sira feto no mane, maibé iha Jezús moris-hi'as, nia hametin no haluan liután ligasaun ne'e: «Ó sei pasar ho isin iha ami-nia leet, la nune'e se ita la moris. Tan ne'e mak ami nia fuan nia matan sira buka hateke ba ita loroloron.

Ó vizita ema hotu no tau matan ba hotu, oh Maromak nia Inan. Defaktu, isin la'ós impedimentu ida ba ó-nia espíritu nia kbiit no enerjia, ne'ebé hu'u iis iha ne'ebé hakarak tanba ó la'ós materiál ».

Don Bosco iha nia moris nia loron ikus sira repete ho seguransa, hanesan hanoin fila fali ba intervensaun oioin Maria nian: «To'o ohin ita la'o iha dalan loos. Ita la bele sala, Maria mak gia ita».

KONSAGRASAUN, JESTU NE'EBÉ HALO LOROLORON NU'UDAR DOMIN FILIÁL NIAN BA MARIA

Husi Evanjellu João nian ba oin Kreda moris konsagraisaun ba Inan no Inan la para atu esperimenta oan-feto no mane sira nia domin ne'ebé saran ba nia sira-nia moris: «Iha krús hun mak inísiu entrega-an espesiál ema nian ba Kristu nia Inan, ne'ebé iha Kreda nia istória hetan prátika no esprime liuhusi modu oioin » (Redemptoris Mater, n.45)

Entrega-an mak esperiênsia no espresaun fiar nian. Nia esensiál ba identidade sarani. Ema ne'ebé la aprende atu konfia la konsege atu sai tasak ho modu kompletu, basá la iha kapasidade ba relasaun. Ema ne'ebé entrega an iha fiar eduka an rasik atu sai don iha relasaun ho Maromak no ho ema seluk, koko “primadu domin nian ne'ebé liberta husi ego no loke ba ‘ó’ ida, ba ita, ba relasaun tasak no ksolok”.

Komunidade monástika barak entrega an ba Maria iha Salve Liurai-Feto, hotu tiha Completas. Hodi hamriik, sira fó kumprimentu ikus loron nian ba Nia.

Ita FMA husi 1889 ita dirije ba Maria iha dadeer, iha inísiu ita nia loron nian atu entrega ba Maria nia liman no fuan buat hotu nu'udar ita nia an rasik no buat ne'ebé ita halo.

La'ós fórmula ida de'it, maibé jestu filiál ida ne'ebé sai empenhu moris nia, eskola formasaun permanente nian, edukasaun ba don totál an rasik nian.

Apontamentu istóriu ruma

Furak atu hanoin katak ema ne'ebé iha ideia atu introdús orasaun ne'e iha esperiênsia orante Institutu nian mak madre Enrichetta Sorbone. Nia halo viajen ida ba Roma iha Abril iha 1888. Iha tempu ne'ebá FMA sira la iha comunidade ida iha Roma nune'e husu alojamentu ba mestra matenek sira inísiu Institutu nian: irmán sira S. Anna nian, ne'ebé Markeza Barolo harii. Iha ne'ebá nia hasoru madre Francesca Garelli, irmán ida husi sira na'in rua ne'ebé hela iha Mornese no nia koñese di'ak.

Nia sente hanesan hela iha uma rasik iha sira-nia leet, no partisipa iha orasaun komunitária irmán sira nian no sente impresaun ba “konsagraisaun” ne'ebé irmán sira halo dadeer-dadeer ba sira-nia protetora S. Anna.

Madre Enrichetta rona no hanoin: “Tansá ita la halo buat ne'ebé hanesan ba Maria Ausiliadora, ita nia oan-feto sira?”.

Fila fali ba Nizza nia lori proposta furak ne'e no ko'alia ho Madre Jerál, Madre Caterina Daghero. Nia rasik konta katak Madre Jerál no Konselleira seluk gosta liu ideia ne'e no sira deside atu ko'alia ho duretór jerál no iha tempu ne'ebá mak padre Bonetti. Nia simu ho di'ak proposta ne'e no hakerek orasaun ida ne'ebé padre Michele Rua aprova no integra iha livru orasaun FMA nian iha 1889.

Orasaun dahuluk ne'e la'ós orasaun intimista. No mós la taka an iha ámbitu Institutu nian, maibé iha kbiit ekleziál.

Fórmula kontinua ho modu hanesan iha ninia konteúdu to'o Kapítulu espesiál 1969. Ho sensibilidade ekleziál ne'ebé Konsíliu Vaticano II hamosu halo mudansa ne'ebé relevante.

Iha KJ 1984 apresenta Livru orasaun foun: FMA sira iha orasaun [Le FMA in preghiera]. Iha nia laran ba dala uluk mak ita hetan testu rua ne'ebé apresenta formulasaun la hanesan, maibé realidade hanesan ho orijen Institutu nian: ita sente Maria presente iha ita-nia moris no ita entrega an ba nia.

Signifikadu entrega-an nian nu'udar jestu filiál

Iha orasaun ida-ne'e bele hetan Institutu nia konfiansa iha Maria, inan no matadalan ba ita-nia vokasaun saleziana. Hanesan Maria akompaña Kreda ne'ebé foin moris, proteje nia, defende nia, loke ba dinamizmu misionáriu, no presente ho modu ativu iha Don Bosco no Madre Mazzarello nia moris, nune'e mak nia akompaña ho laran-nurak inan nian no matenek edukadora nian FMA ida-idak iha ninia esperiênsia moris nian no iha ninia misaun edukativa.

Nia hatudu mai ita "kampu serbisu nian" no hela iha ita-nia sorin nu'udar "Mestra" hodi fó mai ita Jezús rasik: "Ha'u sei fó Mestra ba ó".

Nune'e saran an ba nia mak resposta filiál ida no agradevida ba ninia domin Inan nian ne'ebé nafatin bá uluk ita.

Nune'e orasaun iha significadu jestu domin ida loroloron nian no konfiansa nian ne'ebé halo sai vizivel ita-nia hola-parte ba Maria hanesan ba "oan-feto sira", karakterístika ita-nia identidade nian.

Jestu ne'e fó hanoin buat ne'ebé kalan-kalan Madre Mazzarello halo hodi tau iha Maria nia ain xave uma nian. Iha Mornese Maria Ausiliadora mak uma-na'in, diretora, no gia buat hotu no ema hotu nian. Madre Mazzarello hanorin irmán sira atu tau iha Maria nia ain xave fuan no moris nian, nu'udar ninia oan-feto doben liu.

Nune'e mak dadeer-dadeer, ho orasaun entrega-an nian, ita repete jestu abandonu filiál ba Maria iha haraik-an no konfiansa.

Orasaun saran-an nian mak sínteze ita-nia espiritualidade nian. Iha nia ita hetan dimensaun teolójika, ekleziál, edukativa, komunitária no karakterístika sira ita-nia fizionomia espirituál nian ne'ebé, maski ho termu ne'ebé troka, reflète buat ne'ebé Don Bosco hakarak no presente ona iha primeira fórmula konsagraisaun nian ba Maria: simplisidade iha ksolok, pureza fuan nian, laran-dia'ak preveniente, ne'ebé Maria sai modelu perfeitu.

Ho orasaun ida-ne'e ita – hanesan padre Giorgio Gozzelino nota – «ita tama iha Maria nia entrega-an ba Maromak. Ita saran an ba nia atu ita-nia resposta ba Maromak manán buat ruma husi Maria nia resposta nia forsa no abut metin. Ita la entrega an Virjen atu remata iha nia, maibé atu to'o, hanesan tenke akontese, iha komuñaun ho Maromak».

Entrega-an hakarak asegura iha ita empenhu ida loron ba loron nian hasoru superfisialidade espirituál ne'ebé hasai husi ita dosilidade ba Espíritu Santu nia kbiit. Orasaun ne'e nia finalidade mak fó fila fali hakaran santidade nian espresa iha nota típika sira Maria nian. Ita fó ita nia konsentimentu ba lójika Evanjellu nian nune'e, eduka ita atu troka mentalidade "hodi konsente Maria atu hahoris fali ita".

Jestu entrega-an nian ida-ne'e haka'as ita atu buras iha konxiênsia oan-feto sira-nian: Maromak nia oan-feto sira iha Kristu, maibé mós Maria nia oan-feto sira, Maromak nia Inan. Filiasaun komporta hola-parte iha raan espirituál ida de'it, moris familiár grasa nian, ne'ebé orienta ita-nia liberdade atu buras iha orizote evanjéliku obediênsia nian: "husi Maria ba Kristu, oan sira iha Oan-Mane".

Don Bosco sujere atu halo sai konxiente no sai empenhativu hahalok entrega-an marianu ho “hahalok filiasaun” nian. Iha ninia opúskulu ida 1869 nian ne’ebé Asosiasaun devotu sira Maria Ausiliadora nian uza nia propoin “Hahalok filiasaun iha ne’ebé foti Maria Virjen nu’udar Inan”.

Padre Egidio Viganò hakerek katak data redasaun no konteúdu testu marianu Don Bosco nian ne’e liga hahalok filiasaun ida-ne’e ba Kongregasaun femininu nia naran ho identidade ninia relijioza sira-nian: FMA, ne’ebé nia hakarak “nu’udar modelu entrega-an filiál nian ba Ausiliadora”.

Ho orasaun ne’e ita sente hola parte ba tradisaun antiga liu Kreda nian ne’ebé, hahú husi sékulu dahuluk sira, hakat liu istória tomak no soi ninia tutun S. Luigi Grignon de’ Monfort, apóstolu “eskravidaun” nian eh konsagrasaun totál ba Maria.

Iha krús Jezús konfia nia Inan mai ita. Husi ne’ebá mak hahú entrega-an loos no kle’an ba Maria ne’ebé Jezús rasik kumpre.

Ita FMA sira ho konxiénsia liután adere ba entrega ne’e.

Ho Maria ita sei sai dosil ba Jezús no bele realiza ho efikásia boot ita-nia misaun edukativa ne’ebé reproduz tomak husi buat ne’ebé nia halo ba nia oan sira la’o rai hela ba pátria lalehan: “haburas Kristu iha foin-sa’e sira nia fuan” (art. 7).

Posivel halo entrega an se ita tama iha lójika evanjéliko ain-hakat ki’ik-oan nian, sai labarik iha laran-metin, la’ós iha infantilizmu (kf Mt 18, 1-5). Ne’e mak hahalok ida soe an iha Maria nia liman ho espíritu labarik nian, hodi rekoñese ita-nia nesesidade ba tulun, ba protesasaun, gia nian. Mai itasignifika simu mós bolun atu sai ohin loron “tulun-na’in” foin-sa’e sira-nian atu bele gia sira ba Jezús. Papa Bento XVI bainhira bá iha Polándia, Cestochowa, 26 Maiu 2006, hateten nune’e: “Imi reflete imi-nia an iha Maria nia fuan!” “Husik Maria gia imi atu aprende Jezús!”. Atu ida-ne’e sai ita-nia dalan bá futuro, futuro ida nakonu ho esperansa!